

Na osnovu člana 44., a u vezi sa stavom 2. člana 28. Pravila Univerziteta u Bihaću, Upravni odbor Pravnog fakulteta Bihać, na prijedlog Nastavno-naučnog vijeća Pravnog fakulteta, na sjednici održanoj 12.04.2007.godine, donosi

P R A V I L N I K

O ORGANIZOVANJU I IZVOĐENJU POSTDIPLOMSKOG STUDIJA

I OPĆE ODREDBE

Član 1.

Pravni fakultet u Bihaću (u daljem tekstu: Fakultet) organizira i izvodi postdiplomski studij za sticanje naučnog stepena magistra pravnih nauka za pojedine uže pravne oblasti.

Član 2.

Postdiplomski studij za sticanje naučnog stepena magistra traje četiri semestra.

Član 3.

Postdiplomski studij može se organizirati i u saradnji sa drugim visokoškolskim organizacijama, u skladu sa Pravilima i Pravilnikom postdiplomskog studija Univerziteta u Bihaću (u daljem tekstu: UNIVERZITET).

Član 4.

Postdiplomski studij izvodi se po smjerovima koje utvrđuje Nastavno-naučno vijeće Fakulteta.

Smjerovi se, po pravilu, utvrđuju po katedrama, a izuzetno mogu obuhvatiti programske sadržaje sa područja dvije ili više katedri.

II NASTAVNI PLAN I NASTAVNI PROGRAMI

Član 5.

Postdiplomski studij izvodi se po nastavnom planu i nastavnim programima. Nastavne planove i nastavne programe donosi Nastavno-naučno vijeće Fakulteta, uz prethodnu suglasnost Univerziteta. Nastavni plan postdiplomskog studija je sastavni dio ovog Pravilnika.

Član 6.

Na nastavne planove, nastavne programe i organiziranje postdiplomskog studija shodno se primjenjuju odredbe Zakona o Univerzitetu u Bihaću o dodiplomskom studiju, ako općim aktima Univerziteta i fakulteta nije drugačije određeno.

Član 7.

Nastava se odvija u obliku predavanja, seminarskih radova, praktičnih vježbi, konsultacija, individualnog ili zajedničkog naučnoistraživačkog rada.

Član 8.

Nastava se izvodi po sistemu jednodnevnice ili dva puta dvodnevne nastave, (vikend nastava), prema rasporedu nastave, koje se utvrdi prije početka svakog semestra.

III STUDENTI

Član 9.

Status studenta postdiplomskog studija stiče se upisom u prvu godinu postdiplomskog studija na osnovu konkursa, koji raspisuje Nastavno-naučno vijeće Fakulteta.

Konkurs najmanje sadrži:

- naučnu oblast i smjer na kojem se organizuje studij;
- uslove za upis;
- rokove prijavljivanja i upisa.

Član 10.

Na konkurs se mogu prijaviti kandidati koji su:

1. diplomirani pravnici
2. lica koja su diplomirala na fakultetima društvenih nauka (filozofski i srodni fakultet, ekonomski fakultet, fakultet političkih nauka, fakultet kriminalističkih nauka, teološki i srodni fakultet i drugi fakulteti sa područja društvenih nauka).

Lica iz prethodnog stava tokom studija polažu do određen broj dopunskih ispita koje posebnom odlukom utvrđuje Vijeće postdiplomskog studija.

Član 11.

Na postdiplomski studij mogu preći i studenti drugih postdiplomskih studija, koji su organizovani na pravnim i srodnim fakultetima.

Pitanje priznavanja semestara, seminarskih radova i ispita rješava Vijeće postdiplomskog studija (u daljem tekstu: VIJEĆE).

Član 12.

Konačnu listu kandidata koji ispunjavaju uvjete za upis utvrđuje Vijeće.

Član 13.

Studentu postdiplomskog studija izdaje se upisnica (indeks) kojom dokazuje status studenta.

Član 14.

Za studente svih smjerova u prvom semestru izvodi se nastava iz predmeta Metodologija društvenih i pravnih nauka.

Član 15.

Nastavu izvode predmetni nastavnici Fakulteta, a na prijedlog predmetnog nastavnika, dekan može odobriti angažovanje i nastavnika drugih fakulteta i istaknutih stručnjaka iz zemlje i inostranstva.

Član 16.

Studenti su dužni da pohađaju predavanja i učestvuju u drugim oblicima nastave predviđene ovim Pravilnikom i nastavnim programima pojedinih nastavnih predmeta.

Ovjera prethodnog i upis narednog semestra nije moguća bez potpisa u indeksu predmetnih nastavnika.

Član 17.

Pored uslova iz prethodnog člana za ovjeru prethodnog i upis narednog semestra, student postiplomskog studija treba da ispuni i slijedeće uslove:

1. za ovjeru prvog i upis drugog semestra student je dužan odslušati predavanja predviđena nastavnim planom i programom prvog semestra;
2. za ovjeru drugog i upis trećeg semestra student je dužan da odbrani jedan seminarski rad iz svakog odslušanog predmeta;
3. za ovjeru trećeg i upis četvrtog semestra student je dužan da prijavi temu magistarskog rada.

Član 18.

Upisom u četvrti semestar student postdiplomskog studija završava svoje nastavne obaveze.

IV ISPITI

Član 19.

Usmenom ispitu iz pojedinog predmeta student može pristupiti nakon što odsluša nastavu i odbrani seminarski rad iz tog predmeta.

Prije pristupanja ispitu iz ostalih predmeta i izrade seminarskog rada, student je dužan položiti ispit iz predmeta Metodologija društvenih i pravnih nauka.

Član 20.

Usmeni ispit polaže se pred predmetnim nastavnicima koji su izvodili nastavu.

Nastavnika pred kojim se polaže ispit posebnom odlukom imenuje Vijeće.

Izuzetno, ukoliko postoje opravdani razlozi, Vijeće može imenovati i nastavnika iz odgovarajuće naučne oblasti koji nije neposredno učestvovao u izvođenju nastave iz određenog predmeta.

Član 21.

Ispit se polaže javno, a mjesto i vrijeme polaganja objavljuje se na oglasnoj ploči Fakulteta najmanje 15 dana prije održavanja ispita.

Član 22.

Uspjeh studenta na usmenom ispitu izražava se ocjenama od pet do deset.

Nastavnik, pred kojim je polagan ispit, dužan je da u roku od 15 dana od dana objavljenog ispita dostaviti studentskoj službi izvještaj o ispitu sa zapisnikom sa ispita.

Član 23.

Usmeni ispit može se ponoviti dva puta i to po isteku roka od najmanje 60 dana od dana prethodnog polaganja.

U slučaju prvog ponavljanja ispit se polaže pred predmetnim nastavnikom, a u slučaju drugog ponavljanja ispit se polaže pred komisijom od tri člana koju imenuje Vijeće.

Član 24.

Student je obavezan u roku od četiri godine nakon upisa u prvi semestar da položi sve ispite i odbrani magistarski rad.

Rok iz prethodnog stava može se produžiti od strane Vijeća na opravdan zahtjev studenta još za dvije godine.

V MAGISTARSKI RAD

Član 25.

Nakon upisa u drugi semestar i odbranjena najmanje dva seminarska rada, student stiče pravo da prijavi temu magistarskog rada.

Prijava sadrži:

- naznaku teme rada, odnosno cilj i predmet istraživanja;
- obrazloženje teme, odnosno metode kojom će se kandidat služiti;
- okvirni sadržaj rada;
- prijedlog mentora.

Član 26.

Temu odobrava Nastavno-naučno vijeće na prijedlog Komisije za ocjenu podobnosti kandidata i teme i Vijeća.

Nastavno-naučno vijeće određuje mentora za izradu magistarskog rada.

Član 27.

Kandidat predaje magistarski rad na ocjenu u najmanje 10 (deset) primjeraka.

Član 28.

Nastavno-naučno vijeće obrazuje komisiju za ocjenu magistarskog rada u sastavu od najmanje tri člana na prijedlog dekana i Vijeća.

Najmanje dva člana komisije treba da budu iz uže nastavno naučne oblasti iz koje se brani magistarski rad.

Mentor je član komisije po funkciji.

Član 29.

Magistarski rad se brani javno pred komisijom za odbranu magistarskog rada u sastavu od najmanje tri člana koju imenuje Nastavno-naučno vijeće na prijedlog dekana i Vijeća. U pravilu, sastav ove komisije je istovjetan sa sastavom komisije koja je vršila ocjenu magistarskog rada.

Član 30.

Komisija za ocjenu magistarskog rada dužna je Nastavno-naučnom vijeću da podnese pismeni izvještaj o svom radu, sa prijedlogom, da se odbrana rada odobri, ili da se rad odbije, i to u roku od najviše tri mjeseca od dana obrazovanja komisije.

Član 31.

Ako Nastavno-naučno vijeće prihvati izvještaj komisije za ocjenu rada, komisija za odbranu rada određuje datum, vrijeme i mjesto odbrane magistarskog rada.

O odbrani magistarskog rada Fakultet obavještava javnost i to 30 dana od dana određenog za odbranu.

Pored podataka o kandidatu, temi rada, mjestu i vremenu odbrane, obavijest sadrži i informaciju svim zainteresovanim licima o mogućnosti uvida u magistarski rad – u prostorijama Fakulteta.

Član 32.

Kandidat čiji je magistarski rad negativno ocjenjen, ili rad nije uspješno odbranio na javnoj odbrani, još jedanput može prijaviti novu temu magistarskog rada, i to najkasnije u roku od šest mjeseci po dobijanju pismene odluke o negativnoj ocjeni rada ili o neuspješnoj odbrani rada.

Novi rad mora se predati u roku od dvanaest mjeseci od dana dobijanja odobrenja nove teme magistarskog rada.

Član 33.

Nakon uspješno odbranjenog magistarskog rada, komisija za odbranu magistarskog rada proglašava da je kandidat stekao naučni stepen «magistar pravnih nauka» (magistar iuris).

Na osnovu izvještaja komisije za odbranu, dekan Fakulteta izdaje uvjerenje o sticanju naučnog stepena magistra pravnih nauka, odgovarajućeg završenog smjera.

Diploma se izdaje u skladu sa Pravilima Univerziteta u Bihaću.

Član 34.

Ako student objavi magistarski rad, dužan je da na njemu vidljivo označi da je rad odbranjen na Fakultetu.

Član 35.

Ako se nakon sticanja naučnog stepena magistra pravnih nauka pojavi osnovana sumnja da magistarski rad ne predstavlja samostalni naučno-istraživački rad, ili da kandidat u vrijeme odbrane nije ispunjavao druge uslove, provodi se postupak za oduzimanje naučnog stepena «magistra» shodno odredbama iz člana 39. Pravila Univerziteta.

VI VIJEĆE POSTDIPLOMSKOG STUDIJA

Član 36.

O tekućim nastavno-naučnim pitanjima postdiplomskog studija odlučuje Vijeće.

Vijeće sačinjavaju:

- nastavnici koji su nosioci predmeta na smjerovima koji se izvode;
- dva predstavnika Nastavno-naučnog vijeća, od kojih je jedan predsjednik Vijeća;
- prodekan za naučno-istraživački rad;
- jedan predstavnik studenata kojeg biraju svi polaznici postdiplomskog studija.

Administrativno-tehničke poslove za Vijeće obavlja referent za postdiplomski studij.

Član 37.

Vijeće može raditi ako je sjednici prisutna nadpolovična većina od ukupnog broja članova Vijeća.

Odluke Vijeća su pravovaljane, ako je za njih glasalo više od polovine prisutnih članova Vijeća.

Član 38.

Vijeće:

- priprema prijedloge za pokretanje postupka za početak rada novog postdiplomskog studija, uključujući i inovacije postojećih nastavnih planova i programa;
- predlaže Nastavno-naučnom vijeću Fakulteta raspisivanje konkursa za upis na postdiplomski i predlaže uslove za upis;
- utvrđuje prijedloge nastavnih planova i programa;
- donosi plan nastavnih aktivnosti i predlaže nosioce predmeta;
- utvrđuje vrijeme početka i završetka nastavnog procesa;
- vodi brigu za izvođenje nastave i realizaciju nastavnih planova i programa;
- odlučuje o zahtjevima studenata u skladu sa aktima Univerziteta i Fakulteta;
- stara se o donošenju i izvršavanju finansijskog plana postdiplomskog studija;
- po završetku studija dostavlja Nastavno-naučnom vijeću izvještaj i
- obavlja i druge poslove iz okvira tekućeg upravljanja i rukovođenja postdiplomskim studijem.

Član 39.

Preko svoga predsjednika Vijeće koordinira rad sa šefovima katedri na Fakultetu, ovisno od smjera postdiplomskog studija.

VII FINANSIRANJE POSTDIPLOMSKOG STUDIJA

Član 40.

Postdiplomski studij finansira se iz uplata studenata i drugih izvora.

Uplate studenata odnose se na:

- upisninu, odnosno školarinu (naknada za polaganje ispita iz Metodologija društvenih i pravnih nauka, polaganje usmenog ispita, odbrane magistarskog rada).

Član 41.

Kandidati koji ispunjavaju uslove za upis iz konkursa za upis na postdiplomski studij, dužni su prilikom upisa uplatiti iznos za pokrivanje troškova pohađanja studija.

Član 42.

Visinu svih vrsta naknada koje uplaćuju studenti utvrđuje Upravni odbor Fakulteta na prijedlog dekana, koji prijedlog sačinjava na bazi elemenata kalkulacije troškova studija podnesenih od strane Vijeća.

Član 43.

Finansijski plan postdiplomskog studija za svaki smjer donosi Upravni odbor na prijedlog dekana i uz pribavljeno mišljenje Vijeća.
Sredstva studija vode se i evidentiraju na posebnom računu Fakulteta.

Član 44.

Studenti koji prelaze sa drugih postdiplomskih studija dužni su svoje finansijske obaveze regulisati u skladu sa stadijem postdiplomskog studija na koji se uključuju.

Član 45.

Prilikom podnošenja svake prijave za ispit, odnosno prijavu teme i odbranu rada, kandidat je dužan prethodno izvršiti svoje finansijske obaveze.

Član 46.

Student, koji iz naročito opravdanih razloga bude spriječen da ostvari neku od namjeravanih aktivnosti na postdiplomskom studiju, a izvršio je predviđenu uplatu u skladu sa ovim Pravilnikom, ima pravo na povrat uplaćenog iznosa.

VIII PRELAZNE I ZAVRŠNE ODREDBE

Član 47.

Na pitanja koja nisu regulisana ovim Pravilnikom, shodno se primjenjuju odredbe Pravila Univerziteta koje se odnose na organizovanje i izvođenje postdiplomskog studija na nivou Univerziteta.

Član 48.

Pravilnik stupa na snagu i primjenjuje se danom dobijanja saglasnosti Naučno-nastavnog vijeća Univerziteta.

Broj: 02 - 313 /2007.
Bihać, 12.04.2007.godine

v.d.Dekan-a:

Prof.dr Mujo Demirović

Na osnovu odredbi čl. 42. st. 2. Zakona o Univerzitetu u Bihaću («Sl.glasnik USK», broj 8/98), a po prijedlogu Nastavno-naučnog vijeća Pravnog fakulteta Univerziteta u Bihaću, Upravni odbor Fakulteta, na sjednici održanoj 12.04.2007.godine, donio je

NASTAVNI PLAN I PROGRAM POSTDIPLOMSKOG STUDIJA

I

Pravni fakultet Univerziteta u Bihaću (u daljem tekstu: Fakultet) organizuje i izvodi postdiplomski studij u skladu sa Zakonom o Univerzitetu u Bihaću, Pravilima i drugim opštim aktima Univerziteta u Bihaću i Fakulteta.

II

- Postdiplomski studij organizuje se na smjerovima:
- 1.GRAĐANSKO-PRAVNI
 - 2.KRIVIČNO-PRAVNI
 - 3.DRŽAVNO-PRAVNI (USTAVNO-UPRAVNI) i
 - 4.EVROPSKO PRAVO.

III

Postdiplomski studij odvijaće se po slijedećem

NASTAVNOM PLANU

1. GRAĐANSKO-PRAVNI STUDIJ

1.1. Metodologija društvenih i pravnih nauka	20 časova
1.2. Građansko pravo	20 časova
1.3. Porodično pravo	20 časova
1.4. Obligaciono pravo	20 časova
1.5. Građansko procesno pravo	20 časova
1.6. Trgovačko pravo	20 časova

2. KRIVIČNO-PRAVNI STUDIJ

2.1. Metodologija društvenih nauka	20 časova
2.2. Krivično pravo	20 časova
2.3. Krivično procesno pravo	20 časova
2.4. Kriminalistika	20 časova
2.5. Kriminologija i viktimologija	20 časova
2.6. Međunarodno krivično pravo	20 časova

3. DRŽAVNO-PRAVNI STUDIJ (USTAVNO-UPRAVNI):

3.1. Metodologija društvenih i pravnih nauka	20 časova
3.2. Državnopravni razvitak BiH	20 časova
3.3. Ustavno pravo	20 časova
3.4. Upravno pravo	20 časova
3.5. Uporedni pravno-politički sistemi	20 časova
3.6. Pravo Evropske Unije	20 časova

III

Sastavni dio ovog Nastavnog plana su nastavni programi za pojedine nastavne predmete.

IV

Fakultet može izvoditi postdiplomski studij i za naredne generacije ovih smjerova po ovom Nastavnom planu i priloženim programima, s tim, što je obavezan prije raspisivanja konkursa za upis nove generacije postdiplomaca, ispitati potrebu inoviranja, kako Nastavnog plana, tako i nastavnih programa.

V

Ovaj Nastavni plan postaje punovažan kada na njega da saglasnost Univerzitet u Bihaću.

Broj: 02 - 313 /2007.
Bihać, 12.04.2007.godine

v.d. Dekan-a:

Prof.dr Mujo Demirović